



**India-i tzü ya hadir ka ama
amshitetsü: Pakistan minister**

**Arsenal-i sen crore 665 agi
defender Ezri Konsa alizükogo**



VOL. XXIII ISSUE NO. 311 (ADOK 311) DIMAPUR AMUNGNÜ (SUNDAY) LUROI (AUGUST) 23, 2026

₹ 5.00

Nagaland government school system melenshir; composite schools tentetsü, teacher rationalization asütsü

Kohima, August 22, 2026 (TYO): Nagaland sorkari government school system melenshitsu atema sentong lir ta School Education Advisor Dr Kekhrielhoulie Yhome-i ashi.

Iba maparen nung low-enrolment schools lokteptsü aser kar shibangtsü, composite schools talila lapoktsü aser tesayurtem rationalization asütsü ta pai ashi.

Kohima nung Nagaland Government Higher Secondary School Employees Association (NGHSSEA) General Conference nung o jembidang "school ecosystem tashitaitba kümdaktsütsü aser government schools jenjang tajungba kümdaktsütsü atema iba mapa inyaksü" ta Advisor Yhome-i ashi.

Honibarnü Rüzühkhrie Government HSS Kohima nung "Catalyzing Educational Transformation" omen nung ajemdaker iba sentong agiogo.

School Education Department-i nungdakba data bendenogo aser nungdakba mapang school tem shibangtsü mesüra ka küma lokteptsü ta Dr Yhome-i ashi.

"Sorkarisa tesem kasa nung aliba higher secondary schools den lower-level schools lokteper composite schools teimba kümdaktsütsü. Department-i reprangdanga arunung higher secondary level nung ajungketba sülen enrolment teimba akümba ajitetogo, kechiyong tsüraburtemi elementary education nungi higher secondary level tashi aliba



school nung ang züngdaktsünür" ta Dr Yhome-isa ashi.

Department-isa yimtsüngtem nung school kar jenjang ajema kümdaktsütsü aser litsü, enrolment o nübor nungdakba nung ajemdaker school network yanglushitsü ta paisa ashi.

Government higher secondary schools nung enrolment ajema akümer. 2025-26 nung streams asem nung enrolment 6,475 liasü saka tan academic year nung kaketshir 481 agi tajemba lir ta paisa shisem.

Kohima nung government higher secondary schools ti nung joint admission system ka tendangogo aser admissions tip atemtsü atema private schools den asüngdangtepogo. Iba mapa ajanga enrolment tajungba aküm aser talisa iba ya Tsosoma Higher Secondary School nung atalokogo ta Dr Yhome-isa metetdaktsü.

Sorkari private schools kar nung enrolment talila asüba inyakiyitem azüoktsü aser talisa iba ya higher secondary level nung asütsü ta pai ashi.

"Education department-i subjects tongtipangtem nung tesayur meperir saka tanga subjects nungbo tesayur talila aliba khuret ajurua lir. Ni iba mapa agizüka inyakba sülen graduate mesüra primary tesayur ka dang maniok kechioyong tesayur talila lir" ta paisa ashi.

NGHSSEA nung postgraduate tesayur 780 shi lir aser recruitment formalities tembangba sülen PGTs 70 shi anioktsü aser ano mapa tasen 30 adoktsü ta Dr Yhome-isa ashi.

Nagaland nung school system melenshiba nung infrastructure, governance aser curriculum nung temlung agütsütsü ta pai ashi.

School tashi itdaktsüba maparen nung School Leadership Academy ya shilem ka lir. Külen, curriculum nung digital education, arts, music, socio-emotional learning aser mother-tongue education nung temlung agütsütsü ta Dr Yhome-isa metetdaktsü.

Saturday Art Class initiative nung artificial intelligence amshitsü lenmang bushidar aser

Yamaha International den yaritepa Kohima aser Mokokchung nung pilot projects ajanga music education tenzükdar ta paisa ashi.

Mother-tongue education atema department nung trained language teachers aser textbooks peria mali. Nagaland Curriculum Framework nung mother-tongue education nung temlung kanga agütsütsü aser technology o artificial intelligence ajanga textbooks aser local stories documentation nung yariteptsü ta paisa ashi.

School Education department-isa Nagaland School Education Administrative Service aser Nagaland School Education Service dak sendakba onüktem lemsatepdar ta Dr Yhome-isa ashi.

Department-isa applicable service rules kübok compulsory retirement agütsütsü atema asadangdar. Iba ya nija tesayurtem dak tenük yoka masü saka department sasep nung structural khuretem akoktsü atema lir ta paisa ashi.

"Tatem nung asen directorate

tashimeitra asenoki kecha meinyaktetsü. Sorkari maparen inyakdang tesayurtemi aremzütsü aser amalitep alitsü ayongzüker" ta Dr Yhome-isa ashi

NGHSSEA president Yekavi Swu-i tir o jembidang higher secondary cadre aser Nagaland School Education Service Rules, 2017 tekaraba nung meyipa reprangshitsü ayongzüker.

National Education Policy (NEP) 2020 mapa tenzükba ajanga tesayurtem mapa melenshiogo aser parnok educators, facilitators aser classroom adena orr role models ama inyakdaktsür ta Swu-isa ashi.

Nagaland nung higher secondary schools aika nung postgraduate teachers (PGT) ka danga mali lir ta Swu-isa postgraduate tesayur peria maliba khuret lemsatep.

"School Education Department-i tayongzükbatem angateta lir aser academic year ka nung dangbo khuretem mekottetsü. Department, school lenisüba aser tesayurtem külemi khuretem kokteta aotsü asoshi inyaktsüla" ta paisa ashi.

"Asenoki telok ka ama inyakra, idangji takok angutsü aser state ajungalen tesayurtemi temelenshi bener arurtem ama külemi inyaksü ayongzüker" ta Swu-isa ashi.

Iba sentong nung NGHSSEA Vice-President Dr Visielie menden liasü aser Joint Secretary Rembio Yanthan-i anküp tepela o jembi.

Nagaland state Act kübok NH-202 ulushitsü

Dimapur, August 22, 2026 (TYO): Nagaland Land (Requisition and Acquisition) Act, 1965 kübok National Highway-202 ulushitsü atema Centre sorkari temelaba agütsüogo ta Deputy Chief Minister T R Zeliang-i ashi.

New Delhi nung Union Ministry of Road Transport and Highways (MoRTH) Secretary den Director General aser Additional Director General nung dena ketdangsürtem den senden amending iba lemtet agiogo. Senden nungsa NH-329A, NH-702A aser Foothill Road ulushitsü asüngdangba meyipa reprangshio go ta pai ashi.

Nagaland nung mapatong balala atema ali atema tebilemstü tulu ajurua arur aser National Highways Act, 1956, mesüra Nagaland nung 1965 land acquisition law kübok iba mapa inyaksü ta ashishitep liasü. State sorkari Article 371(A) kübok lateta aliba onüktem nung

ajemdaker Centre ozüing benshitsu ba memulunger.

State sorkari iba nung akangakanga noktakba ajanga Ministry-i Nagaland nung State Act kübok ali alizükba mapa inyaksü atema temelaba agütsüogo.

New Delhi senden nungsa NH-202 atema Detailed Project Report (DPR) benoka lemsatep. State sorkari technical tsütsü metokmeperi kar lia DPR agütsüba MoRTH-i agizüktsü mulungogo aser iba atema state-i shimetetba consultant aser MoRTH engineers asüngdangtepa DPR yanglushitsü ta TR Zeliang-i ashi.

Senden nungsa DPR consultant tasen ka meshimtsü lemtet kechiyong iba ajanga fresh surveys agitsüsa akümstü aser ita aika atsülangtsü ta paisa ashi.

NH-202 ulushiba ajanga Tuensang, Shamator aser Kiphire district tem nung road connectivity tajungba akümstü.

Assam aser Meghalaya tsüingda haihaura katepogo

Guwahati, August 22, 2026 (Agencies): Assam aser Meghalaya sorkartem August 22 nü senden amending tensa süngjemdaktsütsü atema maparen aika inyaksü jembitepogo.

August 19, 2026 nü Shillong nung ozüing alema inyaksangshiba sülen state ana tsüingda tensa mejungi kümer liasü.

Guwahati nung Koinadhara State Guest House nung Meghalaya Deputy Chief Minister Dr Sniawbhalang Dhar aser Assam Minister Atul Bora na menden ser amenba senden nung iba telemtetba agi.

Meghalaya sorkari August 19 nü tatalokba atema sasaa bilemba ashi aser Assam dang iba mapa inyakertem ozüing tapet agi merenshitsu nangzüker.

Iba tatalokba nung shilem agirtem maittsü jangjatsü atema special team ka tentetogo aser tang tashi nung FIR 15 benoka lir ta Deputy CM Dhar-i ashi.

Iba dak sendakba nung KSU lenir asem pua lir aser Assam-registered garitem amakba atema nisung pungu maittsü jangjaogo ta paisa ashi.

Senden nungsa Meghalaya nung anendaka aliba Assam-registered garitem aser passengers anir arutsü indang jembia lemtet agiogo.

Assam-registered gari 3,770 tashi lendong kecha melii Assam-i meyipa yokogo ta Meghalaya sorkarisa ashi.

Assam Control Room-i nisung 175 nungi distress calls 54 tashi agizüka liasü aser parnok rongnung nija gari 22 aser tourist gari 5 nung passengers dena liasü. Külen, Meghalaya Control Room-ia distress calls 379 aru aser iba ya nübortemi safe movement teyari meshiba liasü.

Taruba ghonda 48 tsüingda Meghalaya nung anendaka aliba passengers aser garitem Assam-i meina aotsü sorkartemi mulungtepogo.

Meghalaya-i state nung Assam-registered garitem asoshi security escorts agütsütsü. Meghalaya sorkarisa Assam aser tangalen nungi aruba tourists aser garitem kümzüka ayutsü.

Sorkartemisa inter-state arstsülen mapang shia tebilemstü ajuruba atema permanent mechanism ka amenoktsü mulungtepogo. Iba luden nung state anaprong nungi administrative ketdangsürtem, police personnel aser local representatives adentsü.

Külen, August 22 nü Army aser Rapid Action Force (RAF)-i Shillong nung flag march agiogo.

August 19 nü Khasi Students' Union (KSU) rally ka nung ozüing alema inyaksangshiba sülen security akangshio go.

Centre sorkari Meghalaya state police den yariteptsü atema central armed forces company 5 mapa lemzüksütsü mulunga agizükogo.

IGAR (North)-i Tizit nung tzümetsüng tensa asadanga jaja



Dimapur, Luroi/August 22 (TYO): Inspector General Assam Rifles (North)-i Mon district kübok Tizit nung tzümetsüng agi kongshir aliba tesemtem nung tensa asadanga August 22, 2026 nü iba tesem semdanga liasü.

Iba mapang pai Holy Trinity School, Tizit semdanga yangji tzümetsüng ajanga kakat reju raksatsür aliba repranga liasü. Pai kakat reju ketdangsür tem den sensaksema tang nüngdakba

indang asüngdangyaa liasü.

Kasa mapang Tizit jila nung aliba nüburtem aser ketdangsürtemi Inspector General ajurua parnoki tzümetsüng sülen timtem balala ajurubatem lemsatet.

Inspector General-i kakat reju ketdangsür aser nüburtem dang akokba lenmang nung yariteptsü ta metetdaksü aser mapang shidak nung nüngdakba teyari tem tzümetzüng agi kongshir alir nem agütsütsü ashi.

Pai iba tesem semdangba ajanga Assam Rifles temi Northeast nung nüburtem asoshi bendanga agütsür inyakba tali jangjatsür aser alimar lendong balala agi kongshir alibapurtem den yaritepa nokdaksü temlungtetba aliba sayur. Iba den ano tzümetsüng agi kongshir aliba tesem nung nüburtem nem teyari agütsütsü aser akhi ama kumdaksütsü asoshi maneni meranga inyakba sayur.

Kohima nung MY Bharat District Advisory Council senden amen

Dimapur, Luroi/August 22 (TYO): Kohima District MY Bharat Advisory Council (MYB DAC) indang senden ka August 21, 2026 nü Deputy Commissioner, Kohima indang office chamber nung mena liasü.

Iba senden nung Deputy Commissioner, Kohima, B. Henok Buchem, NCS menden liasü.

District Youth Officer, MY Bharat Kohima, Pradeep-i MY Bharat, iba nükjidong, organisational structure aser lanurtem tiyong südaksür district ajungalen sentong balala agiba indang osang agüja liasü.

MY Bharat ya Ministry of Youth Affairs and Sports,

Government of India kübok autonomous body ka lir, kobai lanur temi anir terenlok mapa inyakba aser arishi küm 15-29 tsüngta lanurtem tajung asoshi amshiba nung rangloker, ta pai metetdaksü.

Iba senden nung sorkar departments, kakat reju, lanur lokti tali lungjemer MY Bharat programmes tem tajungtiba nung inyaksü aser lanir timbai shilem agitsü asoshi yariteptsü nüngdakba indang jembia liasü.

Experiential learning programmes, saisapong, skill development, awareness campaigns aser natonal-level lanur sentongtem nung lanur timbai shilem agitsü asoshi shisa agitepa liasü.

District Youth Officer-i Kohima district nung lanurtem club 30 shi MY Bharat nung affiliate süa lir ta metetdaksü aser MY Bharat digital sapang nung lanur timba register asütsü nüngdakba indang shia liasü.

Senden nungsa kakat rejutem ajungshia Deputy Commissioner teyari nung sentong balala nung kakatshir aser lanurtem dendaksütsü indang jembia liasü.

Iba den Advisory Council indang quarterly functioning indang jembi aser NSS, NCC, Youth Resources and Sports Department aser tanga tapet department den densema stakeholders tem teka amteper inyaksü nüngdakba indang parnoki jembia liasü.

Dimapur nung INTACH National Heritage Quiz competition agiogo



Dimapur, Luroi/August 22 (TYO): Schools tem atema inter school INTACH National Heritage Quiz competition sentong August 21, 2026 nü Tulip Hall, Duncan Bosti, Dimapur nung ayongzüka kakat reju trok nungi kakatshir 60 arua shilem agia liasü.

Iba tetoktepba nung kakatshirtem ana süli team ka ta lemsar Nagaland Round nung toktepa liasü.

Written aser Oral Rounds nungi mezüng jenjang ya Hollotoli School nungi Class 9 nung

azünger Akeho David Chisho aser Shivanshu Khola liasü.

Tanabuba jenjang nunga kasa Hollotoli School nungi Class 8 nung azünger Chenoni Kent aser Denai M. Phom liasü aser tasembuba jenjang ya Delhi Public School nungi Class 8 nung azünger Sadhya Mishra aser Vipi N. Chishi na liasü.

Winning team ya Guwahati nung Regional Round nung shilem agitsü aser yangji parnoki takok ngutetra November ita New Delhi nung National jenjang nung tokteptsü.

INTACH Nagaland Chapter-i takok angurtem, school aser tesayur temi yaritepba atema tenüngsang agütsü aser maneni kakatshirtem angazüksü tejangraba nung anitetsü ayongzü.

Iba tetoktepba nung Hollotoli School, Delhi Public School, Christian Higher Secondary School, Ram Janaki Higher Secondary School, El-Shaddai Academy aser Little Star Higher Secondary School nungi kakatshirtemi shilem agia liasü.

Lein ayong nung kakatshir ka ponger ao

Dimapur, Luroi/August 22 (TYO): St. Paul School, Noklak nung Class 10 nung azünger kakatshir ka Zunki nung Lein ayong nung tzü sashia ayim dang August 20 nü ponger aoba bushi tenzüker Honibarnü agi anogo asem jungogo, saka tang tashi monguteter.

Kakatshir ya Noklak Town nung alir aser par medemer pezü den külemi ayong yagi ao ta ashir. Pa tzü agitsü atema ayong-i ai saka tzü kanga sashia ayimba agi pa ponger ao.

Iba lendong atalokli yimtsüng ketdangsürtem, Village Guards, Noklak Town nung alirtem, temeket yimtsüng nung alirtem,

police, district administration aser State Disaster Response Force (SDRF) lungjemer kakatshir ka Zunki nung Lein ayong nung tzü sashia ayim dang August 20 nü ponger aoba bushi tenzüker Honibarnü agi anogo asem jungogo, saka tang tashi monguteter.

Ayong nung tzü kanga sashia yimaka nüburtem aser rescue teams temi anüngdang aser am mang nung iba tanubosang maneni bushitar ta ashi.

Noklak district ya Myanmar den arütsüa lir aser yangji tanen makai tzünglu kanga sashia arur, anungji Lein aser tanga ayongtem nung tzü sashia kumogo.

Iba osang züluba mapang tashi nisungba ya monguteti bushitepba mapang lir.

PM SHRI Schools atema workshop ayongzü

Dimapur, Luroi/August 22 (TYO): Kiphire district nung aliba PM SHRI Schools atema 'Child Safety and Security' indang workshop ka August 21, 2026 nü DPDB Hall, Kiphire nung ayongzüka liasü.

Iba workshop nung lendong timtem mapang emergency evacuation procedures, basic first aid, fire safety, assembly and evacuation protocols aser tesayur aser staff tem teinyaksü indang tejangja rateta ashi.

Lendong atalokba sülen psychological first aid, stress and trauma management aser tim psychological support kakatshir nem agütsütsü indang

iba sentong nung sayua liasü. Sentong nung Berela. T, District Project Associate, DDMA Kiphire menden liasü aser Takatemjen Pongen, NCS, EAC, Kiphire ajanga pela agizükba ojembia.

Iba sülen PM SHRI Schools atema Child Safety and Security onük T. Lichumse Sangtam Asst. District Coordinator, DMA Samagra Shiksha, Kiphire ajanga lemsatetpa liasü.

Sentong nung Narola Longkumer, District Education Officer (DEO) aden aser Zavito Ltu, EAC, Kiphire ajanga melepzüng o jembia sentong tembang.

Minister Jacob Zhimomi-i Niuland nung lenmang raksar aliba semdang



Minister, PHED and Cooperation, Jacob Zhimomi den ketdangsür temi Hokulbarnü Zhekishe-Vikheto lenmang semdangba mapang tangokba noksa ka yangi angur.

Dimapur, Luroi/August 22 (TYO): Minister, PHED and Cooperation, Jacob Zhimomi-i Hokulbarnü Niuland district nung Aghunaqa EAC Circle kübok Zhekishe aser Vikheto yimtsüng tsüngta lenmang semdanga liasü, koba tawa tzünglu kanga sashia aruba ajanga metenzüka bener ogo.

Deputy Commissioner, Niuland, district administration, civil society organisations aser frontal organisation temi meina Minister Jacob Zhimomi-i iba tesem semdang aser lenmang raksaba agi kongshir aliba yimtsüngtem nungi nüburtemi timtem ajuruba pa den lemsatet aser paia tekeratiba nung tim ketdangsür den iba ken o benoka jembitsü ashi.

Iba lenmang ya yimtsüng 18 shi atema kanga tongtipang lir aser Assam den sendakteper.

Lenmang raksaba ajanga nüburtem senzüsempangba, osettsüset abenba, anogoshi tanurtem school-i aoba nung timtem ajuruba den rongsenketzüng mapa kecha meinyakteter ta ashir.

Aghunaqa Kukami Kuqhakulu-i Minister Zhimomi ajanga Chief Minister Neiphiu Rio dang tekeraba nung iba lenmang yanglushiba maparen tenzüksü ayongzüka liasü.

Kasa mapang Zhimomi-i Aghunaqa headquarters nung Border Rest House semdang, kong 12th IR personnel tem alir.

Pai jawans tem den sensaksema parnok dang yimya tajung amshitsü aser mapang ajak nung saksalema alitsü ayongzü aser tensa kecha nunga law and order aser nübur kumzüka ayuba nung atsüanem masütsü ashi.



Indian National Trade Union Congress (INTUC) aser Congress Seva Dal züingsemtemi Kolkata nung oset jenjang ajungketba atema BJP sorkar anema placard amer longkak aitba mapang tangokba noksa nung angur.

Centre-i Telangana CM nem US semdangtsü atema temelaba magütsü

Hyderabad, Luroi/August 22 (Agencies): Central sorkari chief minister A Revanth Reddy nem US semdangtsü atema temeleta magütsüba sülen pa United Kingdom dang semdang yimti-i August 23 nü meyipa arutsü.

CM Revanth ya university aser nüngtugu educational institution tem semdanga Bharat Future City nung parnok indang campus tem amenoktsü atema ketdangsurtem den ajurutebpa den longjemer inyaksü atema tenangzüktepba balala yangluba sülen August 30 nüang meyipa arutsü liasü.

"Union external affairs ministry-i temelaba magütsüba sülen CM Revanth-i anir lenirtem United States of America (USA)-i aotsü aliba thiogo. Yimden yimsüsuba tsütsülen nungi parnok nem temelaba magütsü," ta chief minister office sangdong ka ajanga metedaktsü.

UK aser USA semdangtsü atema inyakyim dak

ajemdaker state sorkari centre dang temelaba meshi, saka UK semdangtsü atema dang temelaba agütsü. Revanth-i anir ketdangsurtem UK atongaba sülenang centre-i US semdangtsü atema temelaba magütsüba metedakja liasü.

Centre-i iba telemtetba agiba indang jembiba mapang CM Revanth-i, "linük ana semdangba nükjidongji centre indang New Education Policy nung shilem ka ama alima nung riju tajungtibatem India, Telangana aser Hyderabad-i bener arutsü atema liasü. Iba ya alima nung riju tajungtibatem nungi kaketshisatsü, skills, aser training angutsü atema asen lanurtem tejangraba ataloktsüba ka süla," ta ashi.

"Llinük yangertsü aser lanurtem tarutsü atema inyakba mapang asenoki yimden yimsüsuba aser election alema bilemtsüla ta nibo amanga aruogo," ta pai ashi.

Temelaba magütsüba atema aoksaba CM Revanth

Reddy-i lemsatepogo, saka pai centre-i telemtetba agiba tashi anga-a London nungi kidangi meyipa arutsü telemtetba agiogo. Pa Boston, USA-i aotsü melena Hyderabad-i meyipa arutsü, ta CMO-i ashi.

CM Revanth-i ketdangsurtem dang USA-i aotsü aser tenangzüktepba balala yanglutsü atema tetuyuba agütsüogo. "Onoki Hyderabad ya alima shisa tokdendak ka kümdaktsütsü. Osmania nungi HCU aser iba nungi JNTU et al amenokba ajanga Hyderabad ya Human Resources atema hub tajungtiba kümogo. School ka kija; Hyderabad Public School ajanga tech lenir tajungtibatem aniteta koda asenoki alima anitetsü aji sayuogo. IIT, ISB, IIIT, Nalsar tenzükba ajanga Hyderabad-i, temaba jenjang nung aliba corporations aser parnok indang GCC tem atsüa aruogo. Tang asenoki Hyderabad ya alima nung education aser skills rijutem amenoka aliba tesem ka kümdaktsütsü," ta Revanth-i ashi.



Patna, Bihar nung Ganga ayong moshia ayimba sülen Bind Toli temeket tzü agi metsünger aliba anüing ajanga tangokba noksa nung angur.

Rajasthan nung school 611 ki maka inyaksangshidar

New Delhi, Luroi/August 22 (Agencies): Cockroach Janta Party-i Rajasthan nung sorkar meyong school tem tia asadangtsü atema jenjang agiba mapang state sorkari Hokolbarnü Assembly dang school 611 ki maka inyaksangshidar ta metedaktsüogo.

School tem nung infrastructure tapet maliba indang metedaktsüba mapang Rajasthan BJP sorkari iba ya chief minister Ashok Gehlot-i aniba taoba Congress sorkar dak tai tongloktsüogo.

Jhalawar school nung tatalokba sülen sorkari ashiba agi, iba report ajanga sorkar school tem jenjang kanga mejungi aliba temai adokdaktsüogo. BJP-i, sorkar school tem jenjang majungba ya taoba Congress sorkar tai lir, aser parnoki yanglushitsü merangdar ta ashi.

Jhalawar, Rajasthan nung taoba küm anepdang sarasadem agiba mapang school ki ka kilem chirepa kaketshir tenet asü aser 28 yirua liasü.

Opposition lenir Tika Ram Jullu-i ken o ashishiba telangzüba agütsüba mapang

school tem nung infrastructure agi anünga aliba ya sorkari metedakja liasü. Samagra Shiksha Abhiyan kübok 2025-26 atema Unified District Information System for Education (UDISE) data ajanga school 611 ki makai inyaksangshia aliba sayuogo.

Jaipur kübok Bagru assembly constituency nung sorkar school ka asadangi aoba mapang CJP volunteer tem amakba sülen Rajasthan education system nung inyakyim meshidak aliba temai adokogo.

CJP co-convenor Ashutosh Ranka aser pai aniba team ka Rampura Kanwarpura yimtsüing anasa sorkar school ka infrastructure aser facility tem asadangi aoba mapang iba lendong ataloka liasü.

"Parnoki onok amak aser onok volunteer ka teka raksatsü," ta pai ashiba den, parnok amakertem ya Bharatiya Janata Party (BJP) kübok inyakerkem liasü.

Iba tatalokba indang video ka nung nisung telok ka CJP team den olangtepba nguogo aser parnok rongnung kari "Jai Shri Ram" ta ayimba angashio.

India-i tzü ya hadir ka ama amshitettsü: Pakistan minister



New Delhi, Luroi/August 22 (Agencies): Pakistan indang Planning Minister Ahsan Iqbal-i, India-i Indus Waters Treaty ya sota atatsü asoshi telemteba agiba ajanga Islamabad asoshi tetsükdaktsü tasen ka adokdaktsüogo ta tekümdangtsü metedaktsüogo.

Paisa, India-i tsünüsenpongtsü atema tzü nüngdakba mapang tzü nokdanga yua aser tzü menügdakba mapang chioka iba ya hadir ka ama amshitsü ana nung lir, ta ashi.

"Anungji asenoki yangluba tzünokdangtem ya asenok atema buffer asütsü, saka kasa mapang nung asenoki iba ya odangbo sentoka metoktsütsüla. Onoki takok tashi jenjang ajak agidar," ta pai ashi.

Indus Waters Treaty dak sendakba nung kidanger linük ana asendenshir mangatettep adoker aliba mapa tang minister-i iba olen lemsatepogo. Iba iba tenangzüktepba sota atatsü asoshi telemtetba agiba atema süoki ia bilemba Pakistan-i aiben lemsatepa arudar.

Iba ken o ya Pakistan Ato

Kilonser Shehbaz Sharif-ia linük nükjiso anguba anogo matongtsüngda anogo ka lia lemsatepogo. Pai, India-i Pakistan tzü supply amokmerenra Islamabad-i indang indanga telangzüba agütsütsü ta shia tekümdangtsü metedaktsü.

Sentong ka nung o jembiba mapang Sharif-i, Pakistan-i rara masü saka yimjung aginer, saka parnoki yimjung aginüba ya tashimait ka ama mezüngshitsüla, ta ashi.

2025 küm April ita kiralongrartemi Pahalgam amakba sülen India-i Indus Waters Treaty ya sota atatsü asoshi telemtetba agiogo. Iba lendong nung nisung 26 asü.

Pahalgam amakba sülen anogo ka lir Security dak sendakba nung Cabinet Committee senden ka amen aser iba tenangzüktepba ya sota atatsü ta sangdong.

India-i, iba tenangzüktepba ya tang nangzüktepba aliba ama inyaksanshi masütsü aser Pakistan-i arrtsü adena kiralongrartem nem teyari agütsüba maneni tashi iba tenangzüktepba ya sota atatsü ta shiogo.



TIR YIMYIM YIMOBILEM (EDITORIAL)

DIMAPUR SUNDAY, AUGUST (LUROI) 23, 2026

Mapa tasak shimtetba

Israel nungertem Ijip lima nungibo pila saka ano parnok nem Tsüngremi agütsüba Kannan limabo metongtet ta senzüba mapang, kenü anogo Tsüngremi Mosa dang Israel nunger nem Pai agütsüba Kannan lima ladangtsü asoshi tebu kidong shia nungi tanishir kaka yoktsü ashi aser Kibubai melaba ama Mosai parnok kin ter ana nungi tanishir kaka Kannan lima ladangtsü yok ta Züngdangba tapu 13 nung shia angur. Item tanishir 12 rongnung Tsüngremi temulung lemtettsüsa Pa dak amangba tasü tait aser temulung tulu adenba tanishir nisung ana liasü. Tena tenüngji ka Yihuda kidong nungi shimtetba Kaleb aser ka Efraim kidong nungi shimtetba Hoshea, shiba tenüng Mosai Yihusua ta melentsü. Item Israel nunger tanishir ter anaji Kannan lima lenden aser tenem ajunga anogo lir nü ladanga senzür külen parnoki anguba osangji Mosa, Aron aser Israel nübertem dangi bener aru. Ajisüaka, parnok itdangitertem 12 rongnung nisung ter-i bener aruba osang agi Israel nungertem tasü peletdaksü. Itdangiter ter jagi Mosa dang ashi, atangji, Kannan limaji mamatzü aser ninang mojitsü ayimba lima ka lir, ajisüaka yangji alirtemji asenok dang nungi tashi taitba, aso kanga tulu aser parnok yimtiiji atsübangba lir, anungji asenoki item nisungtemji makoktsü. Ashiko, iba osangji angashir Mosa aser Aron na dena tasü mait kümadoker alitsüa akok, Ajisüaka, idangji Kaleb-i ashi, "asenoki kenyongi tudi aser aji agidi, kechiyong asenoki aji kokteta lir." Israel nunger ajak tasü peleter Egypt limai meyiptsü lia Kaleb-i iba ama tasü tait o ashiba agi, Yihusua dena tasü itshir, tenapronglai pei tula süoshi shisaa endoker, Israel nungertem dang Kannan nung aliba aso tulu nisungtemji metsübutsüla, kechiyong iba lima nung alirtemji Tsüngremi parnok nem agütsüogo ta ayimoktsü. Iba mapang nung Israel nungertemi tena long agi onsetsa endoktsüba tensa tia ka nungi Tsüngrem sayatenya agi Kaleb aser Yihusua na dang masü saka Israel nunger ajak kümzükbba asenoki Züngdangba tapu 14 nung tejangja angur. Iba anogo nung jagi tenzüker, Mosa leniba kübok Kaleb aser Yihusua nungertemi anir tasü aser tashi itshir Tsüngremi parnok nem agütsüba Kannan limaji maktettsü asoshi apuso. Aji oda, Mosa melen Yihusua leniba nung Kannan limaji maktetyonga aodang, joko Israel kidong shia nem Tsüngremi melaba ama alinük madak senmang amangtsü asoshi lemsaa agütsütsü tenzüker. Israel kidong ter ana rongnung Manase kin tesadang ka nem aser Reuben aser Gad kin na nembo parnok senmangtsü ali lemtetsü külen, kenü anogo tanüngba kin 9 ser tesadang atema ali alemtsü asoshi kin ajak senteper ain tokdangtsü lia, Gilgal nung Yihuda chirtem Yihusua anasai aru aser parnok rongnung tanishir Kalebi Yihusua dang, parnok nembo küm 45 jakdang parnok külemi Kannan lima ladangtsü asoshi Mosai yokdang parnok tsüng ajemokba li, kong aso tulu aser tashi tait nisungtem liasü aser koba yimtiitem long agi atsüngbanga liasü, item tsükchir tesashi aliba tesem Hebron tenemjiang agüjang aser yangji aliba tsükchirtemji pai aridoktsü ta mepishia meshi, anungji Yihusuai Kaleb nem pai meshiba ama Israel nungertemi kanga tsübuba tsükchir alidak Hebron tenemji agütsü. Tsüngremi Yihusua ajanga Israel kin shia nem ali senmang lemtsüdag, parnok kin shiai tenemleni masü mesüra nisung tamajunger alidak masü saka tsükchir malidak lendenlen dang aginüa bilemer alitsü. Ajisüaka, Kalebibo tsükchir alidak tenemleni dang meshi, kechiyong Pai Tsüngrem dak temulung alem. Tanü asenoki aiben mapa temelaba apia inyaker mesüra mapa meinyak, animebelem ser jangratema alitsüba tesem bushir. Ajisüaka, asenoki teti anisüngzüka alitsü asoshi dang Tsüngrem dang shira, asenoki Tsüngrem leniba tashi aser sayatenya taochiji majangshitsü aser mangutsü. Tsüngremi Israel nunger nem mamatsü aser ninang mojitsü ayimba Kannan lima agütsü saka iba lima nungji alitsü atema parnok jakdang tongpang aika liasü. Adianutem, Tsüngrem tashi aser taochi ya kanga tulu saka nai nü taküm nung timtem aser anibelem maginüra, nai Tsüngrem tashi asangsang nung memetettsü aser Pa sentsüwangshi nung pelaba tepelaji memetettsü.

OLEMSABANG

TEMESEPBA (ALCOHOLISM)

~ Mr. Maong Jamir,
Secretary, Finance and Property, ABAM

(Iba ocet ya Ao Theological Association (ATA)-i adokba Laishir Sangdong nung angutsü.)

Okila

Tamasa Laishir Sangdong azüngertem ajak dangi Yisu Khrista temeim salem tulu abener. Ao Theological Association (ATA) Editorial Boardi iba ocet zülutsü yimli agütsü nung pelaba lemsateper. Kü nem agütsüba ocetji *Temeseppba (Alcoholism- Varos)* ta agüja lir. Iba ocet ya kanga tulu lir, anungji ni kü onükji yi amshi tenzükbba otsü tera tashi lua asenok nem magütsütsü, sakakü onükji tilaba kümer, tanü putu asenoki iba tebilemtsü asoshi kechi inyak nung ajungtsü ta ni ajangshiba, tajitetba aser tebilemba nungi teinyaktsü kar lemsateper.

1. Yi aser laishiba :

Laishiba nung yi aser mejemtzü indang aiben shia angur. Saka tanü putu nung ama yi lar akümba (alcoholic/ alcoholism) mesüra iba ya lokti tebilemtsü ka amabo shia mali. Saka yi tali ajemba anema tekümdangtsü o-bo aika shia angur. Tatishitsü agi; Levi 10:9-10 temeshi o memeshiba aser temerük o memerük tsüngda balala metettsü asoshi yi mesüra mejemtsü tejem ta shia lir. Ano Asaia 5:11 nung Shirnoki yi agi melettet tashi ajemer parnok aiatai ta shia lir. Ano Apejemtsüshin nunga yi ajemba ajanga timtem arudaktsüba aser iba nungi kümdanga alitsü asoshi aiben shia lir.

2. Asen Nagalima nung Yi:

Asen Naga /Ao lima nung tsürabur mapang nungi chi agi yangluba yi (rice beer) amshia aru. Otsü agi ashiba agi American Missionary Conference Kolkata nung 1875 küm akaba mapang Naga lima Arogotem ajonga nung yi majemtsü ozüng azüng aser yi jemertem baptist asütsü memela aser Arogo nung maniok. Yi melena America Missionaritemi süngo dang ajemtsü sayu.

India lima nüjiso ngur aser Naga nunger nüjisobushiba tenzüker külen India Governmenti '*Indian made foreign Liquor (IMFL)*' yi ya Naga limai talubosa yok. Iba mapang nungi lokti aser Arogotem asoshi yi ajemba ya tebilemtsü tulu ka kümadok. Anungji Tsüklai (February) 5, 1962 küm NBCC sentong Mokokchung nung akadang NBCCi Assam Governor dangi Naga limaiyi mebelentsü aser meyokdaksütsü asoshi mepishiba shiti zülü. Iba mapang nungi Yi anema NBCCi noktaksü tenzüker.

3. Yi ya kechi?:

Asen tsüraburtem mapang nungi amshia aruba yiji chi agi (rice beer) yanglua ajem. Saka tanü putu nung amshiba yiji mojidong nungi tzü yimzüka shidaktsü (ferment) yangluba lir. Iba yi dang 'ethyl alcohol' ta ajar aser nisungi ajemtsü asoshi tapet (tapet tetezü-nisungi jemtettsüsa yangluba yi). Iba yi ya mozü balala nunga enoka yanglur.

Saka tanü putu tajemer onsara aküm nung masüba (spurious) yi jenti yangluteta ayoker. Iba masüba yi nung '*ethyl alcohol aser methyl alcohol*' meyokteper yanglur koba dang '*methylated spirit*' ta ajar. Iba yi nung '*methyl alcohol*' tali enoka yanglur aser, iba yi ji tereprangtsü aser tajemtsü nung sakusaka ibaji nisungi ajemtsü asoshi tapet masü (not fit for human consumption). Iba yi nung mim tesashi lir, anungji tenük pokdaksütsü, temang nung timtem aika agütsütsü aser tasüba ajurutsü. Tanü asen lima nung anguba yi teimbaka masüba (spurious) yi lir. Item yi ya asen kiyonger Assam lima nung kanga bulua yanglur. 'The Hindu' Guwahati Newspaper tsüklai (feb)2019 osang nung ashiba agi ibala mesükba yi ajemba ajangaanogo ishika tesüngda nung parnok nisung 102 tashi süngolu nung inyakerkem asüba lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arem nung Catholic nunger asem khasetba bushisüngdangtsü akhanger



Chhattisgarh state kübok Bastar division nung aliba Dantewada tesem nung District Reserve Guard (DRG) personnel tem March 16, 2025 nü arem sema patrolling senzüba noksa nung angur. Karnataka state kübok Hanur nung August 15 nü Forest officials temi Catholic nunger nisung asem shikarir ta tai tonglokja khaset.

Hanur, Luroi/August 22 (Agencies): Karnataka state kübok Chamarajanagar district nung wazüka yua aliba arem min ka nung Forest Department temi Catholic nunger nisung asem khasetba indang obendanger temi bushisüngdang südakjang ta Catholic lenirtemi akhanger.

Nisung asem ya Antony Swamy (50), John Rose Peter (42) aser Anthony Kumar (33) alitsü aser par asem ya Hanur nung Cauvery Wildlife Division kübok Chikkallur Reserved Forest nung August 15 anepdang yakta khaset ta ashir.

Par asem ya ozüng alema arem shiruru shikarir tem wazüka aliba arem telungi aiterem lir ta temulung melemi lir ta arem ketdangsür temi ashi.

Karnataka Chief Minister D.K. Shivakumar-i ashiba agi, parnok khasetba anasa ketdangsür temi prangbong ka aser arem shi südi ta temulung melemi juli ana nung shi sepa aliba ngutet.

Ajisüaka nisung asem kinunger temi aji tiazi ta ashir aser parnok khasettsüsa tensa ajuruba nung parnoki temulung malemer. Par asem ya anasa nungi khaset ta forensic ajanga ngutetba sülen kinunger temi temulung malem tali kumadok.

Nisung asem ya asüba ajanga Hanur nung longkak ait tenzüka

asür nem ochi obendang agütsütsü aser par kinunger nem compensation agüjang ta akhanger.

Asürtem rongnung nisung ka kinungtsüi Hanur police station nung Forest Department personnel anema nisung tepsetba ken o benoka lir ta ashir.

Karnataka sorkari magisterial inquiry ka tenzüksü totuyuba agütsüogo aser Karnataka State Human Rights Commission-i iba tesem semdanga bushisüngdang tenzükogo ta osangtem ajanga ashir.

Arogo lenirtemi obendanger ka tekolakba sür judicial inquiry tenzüksü akhanger aser sorkari bushisüngdangba nung aiben ochi mekakteter, aibelener mejangjar aser ochi obendang magütsür ta ashir.

Mysore Diocese indang Bishop Francis Serrao-i August 19 nü asür kinungertem asr iba lendong nung yirur aliba nisung ka semdangogo.

Iba mapang pai kinungertem dang tanur nem shisaliok aser parnok tarutsü asoshi teyari agütsütsü nangzükogo, ta ketdangsür temi ashi. Bishop-ia obendanger nem bushisüngdang südaktsütsü ayongzüka liasü.

Archbishop Peter Machado of Bangalore-ia August 17 nü sangdong ka nung nisung asem khasetba ya aitsü.

Khristanpuri wazüka aliba arem nung ozüng alema inyakba aser shikariba memelar saka nisung asütsüsa inyakba asoshia temeden magütsür, ta ashi.

Ozüng amshirtem aser forest personnel temi nüngdakba mapang aser ozüng agi melaba nung prangbong amshitsüla, ta pai ashi.

Par asem khaseter takum nung lendong ajurutsü tejangja liasü asü aser injang khaloktsüba mepaidoktetsüsa liasü asü koda, ta pai asüngdang.

Pai-a ochi obendang agütsütsü atema obendanger nem bushisüngdang südaktsütsü ashi.

Arogoi maneni legal system dak tamang akar aser state sorkari ochi obendang agütsütsü imlar, ta Karnataka Catholic Bishops' Council indang odongtar Father Faustine Lucas Lobo-i UCA News dang ashi.

"Onoki ozüng nung tamang akar aser state sorkari ochi obendang agütsütsü amanger, kechiaser senti takum asem samaogo. Talenba makai indang-indanga bushisüngdangba ajanga dang makamait Catholic kibongtem nem ochi obendang agütsütsü," ta Lobo-i ashi.

Ajisüaka paia injang khaloktsütsü ya nüngdaka liasü asü mesüra par asem asüba nungibo jenbutetla asü masü, ta asüngdanga liasü.

ANOGO ABEN TSÜNGREM DEN

AJEMALURTEM TEMOATSÜBA

"Shir ajemalurtem lir parnok temoatsüba: kechiaser parnoki alima senmang amangtsü." (Mat. 5:5)

Ajemalu ta kodang südir Greek oshi nung "praus" ta ajar. Koba tetezü tashi azüoktetba aser anüka kümtetba (gentleness). Arem nung kor apuri tashi tulu aketba kor pua bener arur azüoktetba ama ajemalubaji iba den atishir. Yisui ajemalurtem temoatsüba ta ashiba tetez? tashi lir saka pei sasa azüoka yutetba dangji aja, aser ibai Pa dak aliba jakla liasü. Atangji kor dak koba arem shirur jakla (wildness) liasü saka nisungi ibaji azüokteta kidang mesüteta (domestic) anük-alema kümdaktsüteter yamaji Khrista tashi kübok asenok azüokdaktsütetba dangji ajemalu ta ajar.

Ajemalurtem asoshi temoatsüji parnoki alima senmang amangtsü ta Yisui ashi. Iba tatishitsü Dawid nungi angazüktet.

Dawid dak Saul tepsetsü aser pa chuba menden nung amentsü maongka tajung angu, saka Dawidi azüoka yutet. Kechiaser senmangerji pa masü saka Jonathan liasü. Dawidi tashi aser maongka agitsü azüoka yutet nung Tsüngremi pa chuba kümtsü. Dawid-i, ajemalurtemi alima senmang amanger ta shisatet. Asenoki tashi aser ambangyimertemi alima senmang amanger ama bilemer, saka itemji ajemalurtem atema khen atema ama atarba dang. Kibubai parnok nungi meshizüker ajemalur meyongsa kümdaktsütsü.

Sarasadem:

Kibuba, ni ajemalutsü tanü angazükgogo. Nia alima senmanger ka kümdi. Amen.

Somalia nung tamanger tetsü ka dak kanga sashia azük

Nairobi, Luroi/August 22 (Agencies): Somalia nung tanur ti indang tetsü Islam nungi Khristan dangi meyipogo ta angazükba sülen Muslim extremists temi August 15 nü la dak kanga sashia azük.

Taoba mapang underground Christian fellowship nung züngsema alir Islam dangi meyiper Fatuma Osman-i Muslim nunger dang Afmadow, Lower Juba Region nung tetsür Bible study kati iba atema yok ta osangtem ajanga ashir.

Sophia Ibrahim ya April 2022 nung Khrista agizük, aser la dak tekolak aser temang nung zübu tulu ketja azük, ta ashir. La ghonda pezü shi süchia ao aser azü aika indoker lia kinunger temi mozü kidangi anir ao ta ashir.

Ibrahim aser ano tanga Khristanpur tetsü tem ki ka nung adenshia Khrista takum

otsü video ka repranga aliba mapang Ahmed Hussein ta sür Muslim nunger ka aser ano tebur asem arua parnok dang par yimtsüng nung Khristan yimsü sülen anidaktsü memelar aser parnoki Muslim nunger tem mashi lenamng nung anir ta ashi.

Iba sülen Muslim nunger temi tetsürtem dak süng agi azük aser iba mapang tetsürtem aika temang nung zübu ketja liasü.

Tetsürtem ya iba kidang nungi pei kidangi jena otet, saka parnoki Ibrahim sülen lar ki tonga aru aser iba mapang la sarasadema liasü. Iba sülen parnok ki telungi aita la dak oset techira aser Somali nunger noklang nok agi atep, ta osang ajanga ashir.

Ibrahim ola adokba angashia kidanger tem adenshi aser la tekolak nungi azü yimya

liasü aser parnoki la mozü kidangi anir ao.

"Ni ola tulu agi ayimten, aser kidanger tem arua ni azü agi yimbanger aliba angu. Ni azü jenti indok aser nisung memeteti akum. Ni shia arudang mozüki nung liasü," ta Ibrahim-i ashi.

Iba ama timtem ajuruaka la tamang kasa lir, ta Ibrahim-i ashi aser la takum kumzükbata atema Tsüngrem nem tenüngsang agütsü aser iba tajangshiba ajanga lai maneni Khrista sülen anidaktsü temulungtetba tali akangshir ta ashi.

"Tsüngremi kü takum kumzüka ayur, aser ni Pa sendoktsü makok. Yisu-i kü takum melenshitsü. Ozü kibong nüngdakba Yisu-i agüja arur," ta lai Morning Star News dang ashi.

Lai ano maneni tangar den la tamangba indang lemsateptsü tebilemba lir ta ashi.

"Ni maneni Pa tenzüksü aser tanger nem Pa indang metetdaktsütsü, kechiaser Khrista metetba nung tepela lir aser tatem maka takum alitsü," ta lai ashi.

Ibrahim'er tanur ti ya arishi küm ti nungi 19 tsüngta lir aser ano lai tangar indang tanura pongu repranger.

Ibrahim ya Bodhbarnep (august 19) mozü kidang nungi yok aser security mechi temai madokba tesem ka nung lir.

"Iba ama atalokba osang abentsü kanga tasak, kechiaser Somalia nung Islam ya ozüng agi melaba yimsü lir aser tanga tamangba yimsü mamshitsüla ta amanger," ta Morning Star News osangbener kati ashi.

"Iba tesem nung alir tamangertem asoshi sarasademjang, kechiaser tang parnok kanga tetsübo nung alir." Khristanpur yariba telok

Open Doors ajanga alima nung Khristanpur alitsü linük tamajungtiba 50 asadangba 2026 World Watch List nung Somalia ya jenjang tanabuba nung lir. Iba linük indang constitution ajanga Islam ya state religion ama ashir aser tanga tamangba yimsü prokshitsü memelar, ta US State Department ajanga ashi.

Iba linük nung Muslim nunger aser tangar ajaki sharia (Islamic law) principles nung yangluba ozüng sülen anidaktsüla.

Tamangba yimsü nungi atsüngzüka aoba atema tasüba temerenshi agütsütsü ya Islamic law nung shilem ka lir, ta mainstream school of Islamic jurisprudence ajanga ashir.

Somalia nung Islamic extremist telok, Al Shabaab ya Al Qaeda den sendaktepa lir aser parnoki iba tesayuba nung anidaker.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züngzüksü

(adv) mapang mesüra anogo lateta toktsü (give deadline)

*Yimteni aibelensang nem anogo ana tsüngda yim toktsür aotsü züngzüksü.

Züngzünga

(adj) jangja-jangja, mamatsüsa, aibelen masütsüsa (diligently)

* Asangbai mapa ajak nung maibelentsüsa züngzünga inyaker.

OLONG PAITEP # 76027

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S ___ i
9. Nisung telemsa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

-

(5)

-

(5)

-

(5)

-

(3)

-

(3)

-

(4)

-

(4)

-

(3)

-

(3)

-

(5)

-

(5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Majinü
13. Tzüma nung senzüba

-

(9)

-

(5)

-

(7)

-

(5)

-

(9)

-

(7)

-

(5)

-

(7)

-

(5)

-

(5)

OLONG PAITEP # 76026 TELANGZÜBA**TIPIEN :**

1. Tzüshi, 2. Saru, 4. Renlok,
2. Amos, 9. Zübi, 10. Teki, 11. Kija,
14. Anitet, 15. Süng, 16. Tepunü.

LANGTSÜNGLEN :


1. Tarezmük, 2. Sasa, 3. Rogo,
5. Labi, 6. Kichiba, 8. Shisatsü,
10. Teni, 12. Itsü, 13. Aong.

NAI-A YA METETTER

Mahatma Gandhi-i züluba notes kar Mumbai nung \$1.7 million agi yokdokogo aser iba ya Indian historical document ka sen teimtiba ayokba lir. Mumbai nung amenoka aliba auction house Saffronart-i ashiba agi iba 'collection of notes' ya Mahatma Gandhi den tesentaktep tajung alir aser nüjiso atema rarar Anand T Hingorani'er kibongi anepalua yua liasü.

Hingorani kinungtsü Vidya asüba sülen Gandhi-i pa dangi shidi 688 zülua liasü aser itemji "A Thought for the Day" ta ser kaket ka ama aküm.

1944 aser 1946 tsüngda züluba notes nung ochi, Tsüngrem aser ozüng alema meinyaktsüba dena onük aika amshia zülua liasü.

**NH-2 nung Imphal-Guwahati passenger bus service tenzükshir****Imphal, August 22, 2026**

(Agencies): May 2023 nung kin o kin tsüngda mepetmesü adokba sülen küm asem jungnua lir külen Manipur kübok National Highway 2 (NH-2) nung August 21 nungi public transport tenzükshiogo.

August 21, 2026 nü passengers 125 tashi gari balala nung security escort kübok senzüogo.

NH-2-i Kangpokpi aser Senapati ajanga Imphal aser Nagaland sendakteper aser iba sülen Guwahati tashi aoer.

Hokolbarnü bus ana aser

Winger gari pezü nung passengers 125 apusoa ao. Iba mapang lendong atalokba tesemtem nung armed security personnel-i garitem meina liasü.

Chief Minister Yumnam Khemchand Singh-i August 8, 2026 nü Deputy Chief Minister Nemcha Kipgen aser Saitu MLA Haokholet Kipgen na den külemi Kangpokpi district semdangba sülen iba service tenzükshiogo.

Iba mapang state sorkari kin balala tsüngda movement tenzükshitsü aser regional bus services tenzüksü tenangzükb

agia liasü.

"Sorkari iba mapa tenzükba pelashishia agizüker aser nübortem dang tesüiba atema tatok agütsütsü aser temulung lemtep, temeimtep aser kin o kin putepa alitsü mapa inyaktsü mepishir" ta Thoubal district nungi passenger Kiyam Kumarjit Singh-i ashi.

Imphal East nungia Nivedita-i iba mapa pelashishia agizükba metetdaksü aser valley o hill tesemtem tsüngda transport links tenzükba ajanga yimjung alitsü sarasademba ashi.

Sivasagar nung alirtemi mattresses tamajung agütsüba atema ashishir**Guwahati, August 22, 2026**

(Agencies): Sivasagar kübok Hatikhuli nung tzümetsüng agi kongshia alir nem mattresses agütsüba nung ashishiteper aser nübortemi district administration dang relief materials jungjunga reprangtsü ayongzüko.

Tzümetsüng agi kongshia alir nem mattresses tamajung agütsüba atema nübortemi

Sivasagar Deputy Commissioner den ashishitepogo.

"Nür office ajanga Hatikhuli nung alir nem agütsüba mattresses nai meteta lir asü mali?" ta nisung kati asüngdang.

Nübortemisa mattresses agütsüba agi timtem ajurua aliba kibongtem meperir ta ashir. Hatikhuli nung kibong 150 shi lir saka kibong 50 shi nem dang

mattresses agütsüogo ta parnoki ashi.

Water Resources Department kübok Flood and River Erosion Management Agency of Assam (FREMAA) ajanga district pezü nung tzümetsüng agi kongshia alir nem mattresses lakh 1 lema agütsüba sülen iba ken o adokogo.

Manipur civil society teloktemi Census 2027 thinentsü ayonger**Imphal, August 22, 2026**

(Agencies): Manipur All Manipur United Clubs' Organisation (AMUCO)-i anir civil society telok pungui Prime Minister Narendra Modi dang Manipur nung Census 2027 thinena atatsü mepishiogo.

Parnoki Manipur Governor ajanga Prime Minister dangi iba atema shidi ka züluba nung state nung tensa ajanga census mapa inyakba nung timtem ajurutsü akok ta shia lir.

Manipur kübok district aika nung law & order tayongzükbatem lir aser public senzusenbongba nung tenokdangbatem lir. Kin balala telemsa adokba ajanga nübortemi tangar kin teimba ser alidaki

mouteter aser iba ajanga house-listing aser population enumeration nung tetsükdaksü ajurutsü ta Manipur civil society temisa ashi.

Külen, census personnel-i lendong ajurutsü akok aser iba ajanga data collection ajunga mebententettsü aser final figures shitak masütsü akok ta parnokisa ashi.

Manipur nung nisung 60,000 jungnua pei talidak toktsür aotsüsa kümogo aser parnok relief camps nung mesüra Manipur aser tangaten lidar ta civil society temisa metetdaksü.

AMUCO, den All Manipur Women's Voluntary Association (AMAWOVA), Poirai Leimarol Meira Paibi Apunba Manipur

(PLMPAM), Committee on Human Rights (COHR) aser Manipuri Students' Federation (MSF)-i Prime Minister Modi dangi shidi zülü.

Churachandpur, Tegnoupal, Chandel, Kamjong aser Kangpokpi district tem nung kuli maliser nisung aika aruba atema tebilemtsü abener. Item tesem nung bendangertem aliba ajanga nütsüng yongsük asadangba nung kongshitsü akok ta parnoki ashi.

Parnokisa Manipur nung National Register of Citizens (NRC) mapa tenzüksü takhangba agütsü. Manipur nung population census magidang citizenship verification asütsüla ta parnoki ashi.

Tunisia nung rong ka meküpokba sülen nisung 13 samar bushidar



Tunis, Luroi/August 22 (Agencies): Tunisia tzüküm nung migrant tem mena aliba rong ka meküpokba sülen Tunisian nung 13 samar bushidar, aser nisung ana kümzükogo. Iba rong ya Italy leni oya liasü, ta migrant rights group tekolak kati Honibarnü ashi.

Iba rong ya Brehostibarnü apuso, ta Tunisian Observatory for Human Rights tekolakba Mostafa Abdelkebir-i Reuters dang ashi.

Rong nungi kümzükertem rongnung kati ashiba agi, rong ya meküpokba sülen parnok tzüym nung ghonda aika taolen makai liasü. Tanga nisungba ya temang kanga mejungi lir aser

mozükidang temang anepaludar, ta Abdelkebir-i ashi.

Tunisia ya mapang ka nungbo migrants tem Mediteranean tzüym adentsü atema taposodak tongtibang tesem ka liasü, saka Europe-i teyari agüja tzüym nung tazüokba tesashi akümba aser arrtsü asadanga alitsü atema hadir tasentem benokba ajanga toba küm ka ana tsungda migrant tem senzusenpong kanga ajema kümogo.

Human Rights Watch, Amnesty International aser tanga human rights aser humanitarian teloktemi taoba ita ashiba agi, EU-Tunisia migration tenangzüktepba ajanga Tunisia

nung tejenokdak bushirtem aser migrant tem mezüngmeshia amshiba tali kümdaktsüogo.

Item teloktem yagi EU dang migration aser arrtsü azüoktsü atema inyakyim balala atema Tunisian security force tem nem senotsü teyari magütsütsü ayongzükogo.

Ken o dak sendakba nung Tunisia-i kecha telangzüba magütsü, saka ashiba agi, migrant tem aika senoka aitba ajanga parnok khuret tulu bendar. Tir Kais Saied-i 2023 küm ashiba agi, linük demography melenshitsü atema item nisungtem ya par linüki senoka aitar.

Central Mediterranean lenmang ya alima nung migration lenmang tamajungtiba ka lir, koba Africa aser Middle East nungi migrant temi Europe-i aotsü atema amshir. Tzüym adentsü merangba mapang aiben lendong atalokba ajangshia arudar.

US aser Iran tangatettep kati arutsü teimla mesayur

Cairo, Luroi/August 22 (Agencies): US-i Tehran asoshi shishilempar rongnung tongtipangtiba, China linük densema Islamic Republic nung kongshitsüsa Hombarnü economic sanctions tasen sangdongtsü lia United States aser Iran tsungta o tamajung maneni shiteper.

Rara tenzüker ita trok tajunger, aser linük ana ya tangbo mekhateper, saka yimjung asoshi jembishinütsüa memeranger. Ajakji yutsür Strait of Hormuz ajanga totzü abenba soita lir, kechiaser Tehran-i maongka agia temelaba makai iba tzü lenmang temesü ajanga aotsü merangba oil tankers tem amaktsü amokmerener.

U.S. Treasury Secretary Scott Bessent-i Hombarnü osangbener senden ka nung jembitsü aser Iran dak puti otsü nung tesashitiba sanctions agütsütsü nangzüka lir aser kasa mapang China dang Washington den amalitep

akatsü ajungshir. Iran-i ayokba totzü shilem 80 dak tema China-i alir. Beijing-i yimjung asoshi jembishinütsü ajungshir.

US-i Iran asoshi economic sanctions tasen sangdongtsü aliba ya United Nations nung züngsem linük ajunga indang tashi anema inyakba nung tai mali ta sayutsü merangba lir, ta Iran indang Foreign Ministry odongtar Esmaeil Baghaei-i Honibarnü ashi.

"Iba ama secondary sanctions ya international law nung tamendak dak maka," ta pai X nung zülü.

US Tir Donald Trump-i Iran nem teyari agütsüba linük tem rongsenketzüng tsütsü timtem ajurutsü ta amokmerena lir, aser rara nung kechi ataloker aji Washington-i repranga lir, ta Hokulbarnü ashi.

"Parnoki (Iran) tezüngzüktep yangluner, saka tezüngzüktep shidak yanglutsü parnok renema mali ama ni angateter," ta Trump-i ashi.

US-i Iran nung

rongnendak tesemtem ajunga mokdanga lir, aser Strait of Hormuz nunga rong noklang aika mesenzüteti anendaka lir. Brehostibarnü strait ya ajanga rong pezü kisüing ao, aser item rong pezü rongnung totzü tazü mesüra liquefied natural gas tankers kata meliasü.

Ajisüaka Baghdad-i aiben mepishiba sülen Iraqi oil tankers kar Strait ajanga aotsü Iran-i temelaba agütsü, ta Iran indang state news agency IRNA ajanga Honibarnü ashi.

Iranian parliament speaker Mohammad Baqer Qalibaf-i Iraq semdangba mapang Baghdad-i mepishiba rongnung Iraqi ankers nem temelaba balaka agütsütsü ya ka liasü ta IRNA-i ashi.

US-i amakba ajanga Iran indang rongsenketzüng kanga mejungi kumtsü aser par navy aser air force tashi ajemtsü, saka Tehran-i totzü abenba rong tem aser region nung par tsükchir linüktem amaktsü misile aser drone peria lir ta ashir.



Ukraine linük tiyonglen Kryvyi Rih yimti nung shopping centre ka nung Russia-i Hokulbarnü amakba sülen mokozi adoka aliba noksa ka yangi angur. Russia-i drone ana amshia iba tesem amakba nung nisung 16 asü, 130 yiru aser ano nisung pezü samar bushir.

MULUNGZEN O

“...saka tetsür shibai Kibuba tsübudir, la asangtsü tim”.
A. shin 31:30.



(09th August 1960 – 18th August 2026)

Onoki teti meima aliba, **Lt. Mrs. Karinaro**, kibongi takoksang Tsüngrem aser Kibuba Yisu Khrista nem tenüngsang tetushi agütsür, shibai onok mangyim tia nung aliba mapang onok nem tashi, taochi aser anisüngzük agütsü.

Iba denji külemi, Arogo, lokti tentet balala, kinunger, kiyonger aser tembartem shirnoki ozü kibong, iba jashi mangyim mapang, sarasadem, temeim, rongsen aser teyari balala jenti agüja, onok metoktsüi yariogo, nenok ajak dang kangasa pelar. Onok tsüngdong marutet nung iba sapang ajanga ozü mulungnen O lemsateper. Nenok mapa tajung aser temeim ozü kibong asoshi anisüngzük rongnendong liasü.

Asen takoksang Tsüngremi nenok kija kibong, Arogo aser lokti molamoshia moajangma ta sarasademer.

~ Asür Kibong

ARISHI KÜM 103 AJUNGBA TEPELA LEMSATEPER



Onoki teti meima aliba ojala aser otsüla **Chubalemla Lemtur** w/o Late J.N.Aier den arishi küm 103 ajungba tepela lemsateper, shibai alizüng tajung tongtet, otsü noklangka, temeim, shisatsü aser temonungratsü mapangtem ajangshia arur. Nü nem ano temeim, tepela aser telemla küm aika moajangma.

~ Temeim chimur, semchir, tanabuba semchir aser tasembuba semchirtem.



OFFICE OF THE
CHANGTONGYA KAKETSHIR TELUNGJEM

TENÜNGSANG AGÜTSÜR



Wt. Bendangsenla Associate Professor, Fazl Ali College Mokokchung La ya nübur tenzüka mapa nung alakteta temulung agüja nüngdaka inyakba asoshi 15th August 2026 anogo nung 80 Buba Independence day amung dang Mokokchung District Commendation award 2026 ngua, yimer nem Khonang nungsang bener arutsu nung, Changtongya Kaketshir Telungjem Mendenti i la nem Tenüngsang aser tetushi agütsür. Tarutsü wadang nung Tsüngremi la maneni moaja len aniangma ta Kaketshirtemi sarasademer.

Sd/-
Sb. Akumdong Lkr
Tir, CKT.

Sd/-
Kr. Tiazungla Jamir.
Tongti tezulur, CKT

Nüngtugu boxer Tete par kima khaset



Zolani Tete

Luroi/August 21, 2026 (Agencies): Anaben tashi world champion Zolani Tete South Africa nung pa ki kima khasetogo.

Arishi küm 38 tain asayar ya Hokolbarnü Mdantsane, Eastern Cape nung mendanga atar khaset ta osang ajanga metetdaksüogo.

Ketdangsürtemi ashiba agi, par kikümtong lapoktsü atema gari nung mener ata aliba mapang nisung ana gari ka nung mener arua pa aser pa den mena aliba arishi küm 27 tain tetsür ka dak injang aiben khalokja liasü. Tetsürla ya tang mozükidang temang anepaludar.

South Africa indang minister of sport, arts & culture, Gayton McKenzie-i ashiba agi, "South

Africa nungi anitetba rara tajungtiba ka taküm samaogo."

Ken o nung temulung melemi bilemer ana ya tena dak injang khaloktsüba sülen jena ao aser bushisüngdang ka tenzükogo, ta McKenzie-i shisem.

Tete-i 2017 nungi 2019 tashi WBO bantamweight title bener liasü aser pa, 2014 küm IBF super-flyweight title bener liasü.

Tete-i 2015 küm United Kingdom nung tibenbuba asayaba mapang Liverpool nungi asayar Paul Butler koka liasü.

Maneni pai, title fight ka nung asayar ka takaratiba knockout chidaktsüba Guinness World Record bena lir. 2017 küm Siboniso Gonya den asayaba mapang pai second 11

nung knockout chidakja liasü.

Tete tatemsa 2022 küm July ita asayaogo aser London nung iba asaya nung pai Jason Cunningham knockout chidakja akok, saka pa dak tenokdangba agütsür aliba mozü putetba sülen iba asaya ya magi aküm.

Pa dak anabolic steroid stanazolol putet aser pa nem UK Anti-Doping Agency-i küm pezü atema tenokdangba agütsü.

Pa nem tenokdangba agütsüba ya 2026 küm July ita 29 nü tembangogo, aser pa asüba sülen pa indang manager Mla Tengimfene-i pa meyipa arur asayatsü atema training agia liasü, ta ashi.

Tete-i asaya 34 nung 29 akok, pezü nung tamakok angu aser ka no-contest liasü.

Arsenal-i sen crore 665 agi defender Ezri Konsa alizükogo

Luroi/August 22, 2026 (Agencies): Premier League champions Arsenal-i pound million 51 agi Aston Villa centre-back Ezri Konsa alizükba sangdongogo. August 21 nü 2026-27 season nung mezüngbuba asaya Coventry City FC den asayatsü lia parnoki iba osang ya sangdonga liasü.

Konsa ya jersey number 15 asemtsü aser pa Arsenal nungi mezüngbuba asaya taruba hopta Villa den asayatsü.

William Saliba FIFA World Cup mapa teberem yiruba sülen Arsenal puri Konsa alizüksü atema jenjang agi tenzuka liasü. Saliba ya alima nung lanur defender tem rongnung tajungtiba ka ta züngshir. Pa surgery bo magi, saka ita ana mesüra asembo masayatetsü.

Arsenal pur ano right-back Jurrien Timber-a yirur lir aser iba ajanga parnok tachichilen defence atema arishi küm 21 tain Christian Mosquera aser yirua dang alisang Ben White na dak metaloker lir.

"Iba club nung adenba ya maongka ka aser ni asayatsü



Ezri Konsa

matateter. Ni maneni takok nguner aser iba atema ni idaki aru. Iba club atema takok bener arutsütsü asoshi ni takokba tashi inyaksü. Alima nung team tajungtiba ka nung asayatsü maongka anguba ya ni aser ozü kibong atema nemadangsü mapang ka lir," ta Konsa-i ashi.

Saliba ya Arsenal pur asoshi tongtiban nükdang ka lir aser pai passing ka junga sütetba ajanga asaya buildup mapang teyari tulu agütsür. Kasa mapang nung arishi küm 28 tain konsa ya passing aser dueling, Premier League charts nung temaba jenjang nung lir.

"Ezri ya jenjang aketba de-

fender ka aser pa ya Premier League nung asaya ajunga nung amai kanga junga asayaba asayar ka lir," ta Arsenal sporting director Andrea Berta-i ashi.

"Pai central defence aser right-back naprongla nung ayong ayonga asayateter asünung onoki tongtiban takok maroktem atema toktepba asayaba mapang pa kanga tongtiban asayar ka asütsü," ta paisha shisem.

Villa puri England nung takok ngua asayaba aser parnoki Europa League akokba mapang Konsa-i tongtiban shilem agiogo.

"Asenoki otsü tasen yangluogo," ta pai club dang salem ashiba mapang ashi. "Salem ashitsü temela masü aser nenok ya kü atema koda tongtiban aji o agi rasa ashitsü makoker. Ni iba club nung asangur chanu ka ama aden aser ni nisung tain ka ama club toktsür. Ni küm tenet asayaba mapang nenoki nongita yariba ni kodanga mamatoktsü. Item tajangshibatam kü mulung nung teti alitsü. Villans tem dang kanga pelar," ta pai shisem.

Australia-i Bangladesh nem run 64 dang yangludaktsü saka batter temi junga masayatet

Luroi/August 22, 2026 (Agencies): Taoba hopta mimlai lia tamakok anguba sülen Australia-i Mackay nung tanabuba Test mezüngbuba in-nings nungbo Bangladesh nem run 64 dang yangludaktsü, saka iba asaya nunga Australia nunger batter temi junga masayatet.

Mitchell Starc-i asaya tenzükur mezüngbuba ball nung Shadman Islam out sütsü aser ball 22 dang aonba sülen wicket pongu agi. Iba mapang tashi nung Bangladesh team-i wicket 5 out ser run 12 dang yanglur liasü.

Captain Pat Cummins-ia run 25 agütsür wicket 3 agi. Bowler temi ball kanga junga aonba mapang Bangladesh nunger batter temi shot tamajung kar asayaba ajanga parnok kanga kara out süatok aser parnoki over 34 nung asayar ajak out ser run 64 dang yangluteta liasü.

Australia pur batting amenba mapanga asayartem maneni aika out asü aser mezüngbuba anogo asayar 18 tashi out süa liasü.

Australia team-i wicket 8 out ser run 165 yanglua parnok run 101 agi tejakdang lir.

Matt Renshaw shiba Jake Weatherald melen shima liasü pai run ti dang yanglur out asü aser Travis Head-a run 22 dang yanglur out süatok. Marnus Labuschagne-ia run pezü dang yangluteta liasü.

Labuschagne ya innings 43 tashi century ka danga meyanglui asaya arudar.

Steve Smith aser Cameron Green nati asaya tera yaglushia tena senteper run 77 yanglu, saka Smith-a run 42 yanglur aliba mapang out asü.

Maneni Alex Carey run pongu dang yanglur out asü aser Beau Webster duck achi.

Darwin nung tanabuba in-nings nung century yangluba sülen anogo tembangba mapang tashi nung Green-i out mesüi run 51 yanglur liasü. Pa aser Nathan Lyon (10) na batting mena aliba mapang anogo tembang.

Bangladesh atema left-arm pacer Shoriful Islam-i run 35 agütsür wicket 6 agia liasü.

Iba asaya nung wicket 5 agiba sülen Starc-i South Africa nunger asayar Dale Steyn ajateta pa Test asaya nung wicket timtiba agiba asayartem rongnung 10buba tongtetogo. Pai wicket 441 agir lir.

Wb.Imomar alima ajunga Badminton asaya toktepba nung tongti shilem agidagi



Wb.Imomar BWF World Championships-2026 nung adenba noksa nung angur.

Mokokchung, Luroi/August 22 (TYO): Indira Gandhi Stadium, New Delhi nung 30Buba Badminton World Federation World Championships-2026 August 17 nungi tenzuka asayadagi aser August 23 nü tashi asayatsü.

Linük 38 nungi asayar takotet aika adenshia iba asayamung nung asayadagi aser iba championship nung tebur kija asaya, tetsür kija asaya, tebur tarep

asaya,tetsür tarep asaya aser tarep teyoktep asaya ta category balala asayadar.

Iba Championship nung Badminton Association of India tenüing nung National Umpire Grade-II Wb. Imomar Technical Official ka ama shilem tajung agidagi.

Wb. Imomar ya Mokokchung District Badminton Association nunga tir teinyakdak lir.

BILEMDANGANG

"Taochi agi talangka aremzüker."